

Nov dretg da la protecziun d'uffants e da creschids

Tschintg Apuc remplazzan il 1. da schaner 2013 las 17 autoritads tutelaras

■ (cc) Il nov dretg da la protecziun d'uffants e da creschids entra en vigur il 1. da schaner 2013. Per quest termin metta la regenza grischuna en vigur ils relaschs executivs chantunals. La novaziun la pli impurtanta en quest connex è la furmaziun da tschintg autoritads chantunals per la protecziun d'uffants e da creschids che remplazzan las autoritads tutelaras actualas. Suenter bunamain in onn da preparaziun e da furmaziun èn las novas autoritads ussa prontas per cumenzar cun lur lavur. Il 1. da schaner 2013 entra en vigur il nov dretg da la protecziun d'uffants e da creschids da la confederaziun. Quest nov dretg tegna quint da las midadas socialas, economicas e giuridicas, concepescha las mesiras uffizialas anc pli fitg tenor il cas singul concret e promova il dretg d'autodeterminaziun e la solidaritad entaifer la famiglia. Il punct central ord vista organisatorica è la furmaziun d'autoritads spezialisadas interdisciplinaras che duain dumagnar meglier las pretensiuns creschentas. Qua tras vul la confederaziun professionalisar ils fatgs tutelar. Da las novas structuras profite-scha quasi l'entira populaziun. Pervia dal svilup demografic daventan las autoritads per la protecziun d'uffants e da creschids numnadamain adina pli impurtantas, ed adina dapli persunas vegnan en contact cun ellas.

Tschintg autoritads per la protecziun d'uffants e da creschids (Apuc)

Pervia da las prescripziuns stringentas dal dretg federal sto vegnir furmada ina nova organisaziun administrativa en il



chantun Grischun. En la sessiun da december 2011 ha il cussegl grond concludì cun ina revisiun parziala da la lescha introductiva tar il cudesch civil svizzer da furmar tschintg autoritads autonomas cun cleras cumpetenzas territorias. Mintga autoritad per la protecziun d'uffants e da creschids (Apuc) sa cumpona d'ina manadra u d'in manader en uffizi cumplain sco er d'almain dus ulteriurs commembers da l'autoritad en uffizi cumplain u principal che han las enconuschientschas spezialisadas necessarias en las disciplinas centralas «dretg», «lavor sociala» e «pedagogia/psicologia». Las Apuc vegnan mintgamai sustegnidas d'in secretariat. Quel ademplescha principalmain incumbensas en ils secturs

«scleriments giuridics e dals fatgs», «revisurat» ed «administraziun».

Da la primavera fin la stad 2012 ha la regenza grischuna tshernì la manadra ed ils quatter manaders da las Apuc sco er ils ulteriurs commembers da las autoritads. Fin l'atun 2012 han er pudì vegnir occupadas las plazzas en ils servetschs da sustegn. En connex cun l'occupaziun da las plazzas èsi vegnì guardà d'engaschar sche pussaivel collavuraturas e collavuratur vertents da las autoritads tutelaras.

In team da project ha accumpagnà las lavurs per las Apuc

Dapi il relasch da la legislaziun executiva chantunala avant in onn èn stadas necessarias lavurs cumplessivas da furmaziun

per che las tschintg Apuc Engiadina/Vals dal sid (a Samedan e Scuol), Grischun central/Moesa (a Tusaun e Roveredo), Grischun dal nord (a Cuir), Partenz/Tavau (a Tavau) e Surselva (a Glion) possian cumenzar il 1. da schaner 2013 cun lur activitads operativas. Questas lavurs e la coordinaziun ha surpiglià in team da project ch'è vegnì manà da cusseglier guvernativ *Christian Rathgeb*. Dal team da project han fatg part ultra da la manadra e dals manaders designads da las Apuc tranter auter er represchentants dals uffizis interdisciplinars da l'administraziun chantunala e dal departament da giustia. Il team è vegnì sustegnì tras la firma PersPec ch'è medemamain incaricada en il chantun Turiug cun la furmaziun da singulas

autoritads per la protecziun d'uffants e da creschids.

Tras il transferiment da las incumbensas dals circuls al chantun surpiglia il chantun en l'avegnir ils custs da las autoritads per la protecziun d'uffants e da creschids. Cunquai che la finanziaziun da las autoritads tutelaras croda davent vegnan las vischnancas distgargiadas tut en tut per var dus milliuns francs per onn.

Curatellas profesionalas sco incumbensa regionala

Pervia da la restructuraziun sin plaun administrativ sto l'organisaziun da las curatellas profesionalas (fin uss avugadias uffizialas) medemamain vegnir examinada, cumbain ch'i na resulta betg in basegn d'agir direct tras il dretg federal. Il cussegl grond ha concludì da designar la gestiun da las curatellas profesionalas sco incumbensa regionala e betg pli sco incumbensa cirquitala. Qua tras tegna el quint da la refurma dal territori, tenor la quala ils circuls na duain survegnir naginas incumbensas pli. Cun quest conclus vegnan las curatellas profesionalas finanziaadas sco fin ussa tras las vischnancas. Grazia ad ina regulaziun transitorica pon las instituziuns ch'èn responsablas fin ussa manar las curatellas profesionalas fin la fin da l'onn 2014. Quai permetta che la reordinaziun dal dretg da la protecziun d'uffants e da creschids vegnia coordinada en moda optimala cun la refurma dal territori.

Ulteriuras infurmaziuns sco er tut ils lieus e las adressas da las 5 autoritads per la protecziun d'uffants e da creschids dal chantun Grischun chattais Vus sut www.kesb.gr.ch Davart quest tema stat a disposiziun in video sut www.gr.ch

Pervia dal svilup demografic daventan las autoritads per la protecziun d'uffants e da creschids numnadamain adina pli impurtantas, ed adina dapli persunas vegnan en contact cun ellas.

KEYSTONE